



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK
Stručna služba za poslove
Općinskog vijeća



Vogošća, ul. Jošanička br. 80, tel: 00387 33 586 412, 586-407

Broj: 12-04-sl./26

Vogošća, 28.08.2026. godine

VIJEĆNIČKA PITANJA
POSTAVLJENA NA 20. REDOVNOJ SJEDNICI OPĆINSKOG VIJEĆA VOGOŠĆA
održanoj 27.08.2026. godine

Na 19. redovnoj sjednici Općinskog vijeća vijećnik **Mehić Almedin (u ime Kluba vijećnika SDA)** postavio je slijedeće vijećničko pitanje:

20/1. Kada će se i kako riješiti problem pasa lutalica na području općine Vogošća. Prema informacijama građana koji se redovno žale na problema pasa lutalica, najčešće u urbanom dijelu naše općine, radi se o enormno velikom broju, odnosno nekoliko čopora pasa je prisutno. Na tom lokalitetu još uvijek postoje lutalice koji uznemiravaju građane, a posebno majke sa djecom, starije osobe i učenike. Molim nadležne da poduzmu aktivnosti na rješavanju ovog problema. Čopor se kreće oko predškolskih i školskih ustanova, te među djecom izaziva paniku i strah. Da li i s kim imamo ugovor o uklanjanju istih. Prije nekoliko dana sam bio svjedok napada na stariju gospođu sa pomagalima u ulici 24.juna, naselje Nova Vogošća, koja je u zadnji momenat izbjegla stravičnu situaciju. Apelujem da se kazne ovi što nelegalno dovoze pse, pretežno u poslijeponoćnim satima, izbace iz vozila i samo nestanu. Molim također i policijske službenike da uprate i debelo kazne takve osobe.

Vijećnik **Cvrk Ćamil (u ime Kluba vijećnika DF)** postavio je slijedeće vijećničko pitanje:

20/2. Stanovnici ulice Gornja Jošanica I pitaju da li će i kada u njihovoj ulici biti urađen trotoar.

Vijećnik **Efendić Emir (u ime Kluba vijećnika S BiH)** postavio je slijedeća vijećnička pitanja:

20/3. Postavljam pitanje prema nadležnoj općinskoj službi vezano za izgradnju igrališta za djecu starosti preko sedam godine u naselju Rosulje, odnosno ulici 24 juna. Naime, građani naselja Rosulje iznose problem nedostatka igrališta za djecu preko 7 godine, kao i neadekvatan prostor za djecu do 7 godina koji je namijenjen za igru i zabavu. Djeca preko sedam godina i mladi nemaju adekvatan prostor za sportske aktivnosti kao što su mali fudbal, košarka, rukomet i sl. jer u naselju Rosulje iako postoji velika potreba ne postoji takav sportski sadržaj. Zbog navedenog djeca i mladi svakodnevno igraju fudbala po trotoarima i ispred haustora pored prometne saobraćajnice, što je veoma opasno za njihovu sigurnost, a nije adekvatan prostor za takvu vrstu sporta. Prema njihovom viđenju u naselju Rosulje, u ul. 24 juna preko puta broja 18b i 18c, postoji lokacija koja pripada općini Vogošća, te građani postavljaju pitanje da li je moguće izgraditi privremeni sportski teren za djecu uzrasta preko 7 godina, do konačnog rješenja navedenog pitanja.

20/4. Kada će biti na adekvatan način postavljeno ogledalo u ulici Uglješići iza parking prostora TV Hayat, jer je isto od samog postavljanja u nagetom položaju, tako da ne koristi svojoj svrsi. Navedeno ogledalo je postavljeno prema inicijativi Kluba vijećnika Stranke za BiH, međutim zbog neadekvatno izvedenih građevinskih radova isto ne koristi svrsi i vozačima kako bi im se olakšao prolazak kroz raskrsnicu.

Vijećnik **Handžić Jasmin (u ime Kluba vijećnika SDA)** postavio je slijedeća vijećnička pitanja:

20/5. Pitanje upućujem Ministarstvu saobraćaja Kantona Sarajevo i JP Ceste Federacije BiH. Obzirom na to da su u toku radovi na izgradnji kružnog toka Kobilja Glava, te da je evidentan zastoj u izvođenju radova, molim nadležno Ministarstvo da dostavi informaciju o razlozima

trenutnog zastoja. Također, molim da se pojasni kada se očekuje nastavak radova te da li će trenutni zastoj uticati na rokove za završetak radova predviđene ugovorom. Ukoliko je došlo do izmjene ugovorenih rokova, molim da se navede novi rok za završetak radova i razlog izmjene.

- 20/6.** Molim nadležnu službu da dostavi informaciju o stanju i toku aktivnosti na sanaciji pasarela na području Hotonja i Kobilje Glave. Šta je do sada urađeno, u kojoj fazi se trenutno nalaze aktivnosti na sanaciji te da li je poznat rok za završetak radova.

Vijećnik **Gljiva Avdo (u ime Kluba vijećnika DF)** postavio je slijedeće vijećničko pitanje:

- 20/7.** U ime građana naselja Donja Vogošća pitam da li je u planu rekonstrukcija ulice Hilme Krke koja je uvjerili smo se u vrlo lošem stanju. Dobro znamo da je izuzetno frekventna, obzirom da služi i kao alternativni put za Ilijaš.

Vijećnik **Hebib Armin (u ime Kluba vijećnika SDP)** postavio je slijedeća vijećnička pitanja:

- 20/8.** U kojoj fazi se trenutno nalaze radovi, odnosno aktivnosti na sanaciji klizišta Orahov brijeg kod broja 89 i kada se očekuje početak izvođenja radova na sanaciji ovog klizišta.

Obrazloženje:

U materijalima koji su dostavljeni uz Izvještaj o radu Općinskog načelnika i općinskih službi za prvih šest mjeseci 2026. godine navedeno je da su, zbog neuspješnog okončanja prethodno provedenih postupaka, u mjesecu junu ponovo pokrenuti postupci za izbor najpovoljnijeg ponuđača za izvođenje radova na sanaciji klizišta Orahov brijeg kod broja 89. Iako su informacije o ponovnom pokretanju postupka navedene u materijalima za sjednicu Općinskog vijeća, zbog velikog interesa građana smatram da je potrebno javno obrazložiti u kojoj se fazi trenutno nalazi ovaj projekat i kada građani mogu očekivati konkretne radove na sanaciji klizišta.

- 20/9.** U kojoj je fazi usvojena inicijativa u predhodnom mandatu Općinskog vijeća za izgradnju ograđenog i izdvojenog parka za kućne ljubimce. Da li je Općina odredila lokaciju koja zadovolja propisane kriterije i da li bi se isti nalazili u užem dijelu centra Vogošće.

Obrazloženje:

U prethodnom mandatu Općinsko vijeće Vogošća usvojilo je inicijativu za izgradnju ograđenog i izdvojenog parka za kućne ljubimce. Na 2. sjednici Općinskog vijeća u ovom mandatu ponovo sam postavio vijećničko pitanje u vezi s realizacijom navedene inicijative, kada sam dobio odgovor da je u toku pronalaženje adekvatne lokacije. S obzirom na to da je od tada protekao određeni vremenski period, zanima me u kojoj se fazi trenutno nalazi realizacija ove inicijative. Veliki broj građanki i građana Općine Vogošća vlasnici su kućnih ljubimaca koje svakodnevno izvode u šetnju. Iako ne raspolažemo preciznim statističkim podacima o njihovom broju, evidentno je da na području općine ne postoji nijedan posebno uređen prostor namijenjen njihovom boravku. Istovremeno, na sve većem broju javnih zelenih površina zabranjeno je izvođenje pasa, dok dio građana opravdano želi koristiti parkove i javne površine bez prisustva kućnih ljubimaca. Upravo zbog usklađivanja interesa svih korisnika javnog prostora, izgradnja namjenski uređenog i ograđenog parka za kućne ljubimce predstavlja kvalitetno i dugoročno rješenje koje bi doprinijelo unapređenju kvaliteta života u našoj lokalnoj zajednici. Iz navedenih razloga molim da mi se dostavi informacija o dosadašnjim aktivnostima i planovima za realizaciju ove usvojene inicijative.

Vijećnica **Šabić Dalia (u ime Kluba vijećnika DF)** postavila je slijedeće vijećničko pitanje:

- 20/10.** Na jednoj od prethodnih sjednica Općinskog vijeća postavljeno je pitanje vezano za problem rupe odnosno otvora na trotoaru na autobuskom stajalištu kod Besta u Hotonju, iz kojeg se širi izrazito neugodan i intenzivan miris. Problem je i dalje prisutan, a posebno dolazi do izražaja tokom toplijih dana, kada je zbog nesnosnog smrada građanima gotovo nemoguće boraviti na autobuskom stajalištu i čekati javni prijevoz. S tim u vezi, postavljam pitanje nadležnoj inspekcijskoj službi: Da li je nakon ranije upućenog pitanja inspekcija izašla na teren, da li je utvrđen uzrok neugodnog mirisa i ko je nadležan za sanaciju ovog problema. Ukoliko jeste, koje su mjere poduzete, odnosno šta je moguće učiniti kako bi se problem trajno riješio. Molim da se, imajući u vidu da problem traje duži period i da svakodnevno

pogađa veliki broj korisnika javnog prijevoza a i stanovnika obližnje stambene zgrade, izvrši ponovni pregled lokacije ukoliko do sada nije pronađeno adekvatno rješenje.

Vijećnik **Pašagić Almir (u ime Kluba vijećnika SDP)** postavio je slijedeća vijećnička pitanja:

20/11. Postavljam pitanje Općinskom načelniku i nadležnim općinskim službama:

1. Koja je institucija, služba ili javno preduzeće preuzelo obavezu održavanja javne površine uz korito Jošaničkog potoka, nakon završetka radova u okviru Prve faze projekta uređenja ovog vodotoka.
2. Kada će se izvršiti hitna intervencija i košenje na pomenutoj lokaciji, s obzirom na to da je veći dio ove novouređene površine trenutno potpuno zarastao u čičak i ambroziju koji su dostigli visinu od blizu 2 metra.

Obrazloženje:

Nakon što su radnici vogošćanske firme „Hidrom“ i firme „Musić-Compani“ završili prvu fazu radova na čišćenju i uređenju dijela korita Jošaničkog potoka, prostor u samom centru naše općine dobio je privremeno svjež i uređen izgled. Za ovaj projekat su izdvojena značajna budžetska sredstva u iznosu od 150.813,00 KM. Međutim, zbog izostanka redovnog održavanja nakon građevinskih radova, na ogoljenom tlu je došlo do eksplozivnog rasta invazivnih korova. Prostor iznad mosta Jošaničkog potoka je zarastao u čičak i ambroziju visine 2 metra. Podsjećam da je na nivou Federacije Bosne i Hercegovine na snazi Odluka o mjerama za sprječavanje širenja i uništavanje ambrozije, prema kojoj su svi pravni i fizički subjekti, uključujući i lokalne samouprave, zakonski obavezni kontinuirano uklanjati ovaj korov prije sezone cvjetanja. Ambrozija je jedan od najjačih prirodnih alergena. S obzirom na to da se ova površina nalazi u neposrednoj blizini šetališta i trenutno stanje direktno ugrožava zdravlje stotina građana Vogošće koji pate od alergija. Pored zdravstvenog aspekta, ovakav izgled Vogošće potpuno anulira estetske i ekološke efekte projekta u koji je uložan ogroman javni novac. Tražim hitan odgovor i konkretan rok u kojem će teren biti očišćen.

20/12. Postavljam pitanje Policijskoj upravi Vogošća (MUP KS) koje glasi:

1. Koliko je prekršajnih naloga izdala Policijska stanica Vogošća u proteklih 12 mjeseci u ulici PO Zvijezda po osnovu nepropisnog parkiranja na kolovozu i trotoaru, te ugrožavanja bezbjednosti pješaka.
2. Da li je Policijska stanica Vogošća zaprimila i dala stručno mišljenje na dosadašnje zahtjeve građana i mjesne zajednice da se ulica PO Zvijezda proglasi jednosmjernom ulicom, te kakav je zvaničan stav policije po pitanju izmjene ovog režima saobraćaja s aspekta sigurnosti.

Obrazloženje:

Stanovnici ulice PO Zvijezda već duže vrijeme se suočavaju sa ozbiljnim saobraćajnim kolapsom. Zbog širine kolovoza i neodgovornog parkiranja automobila u jednoj traci, ulica je faktički svedena na jednu traku, što onemogućava normalno odvijanje dvosmjernog saobraćaja. Građani su u više navrata opravdano tražili da ulica postane jednosmjerna kako bi se saobraćaj stabilizovao i uveo red. Budući da do sada problem nije sistemski riješen, a na terenu imamo i pokušaje nelegalnog regulisanja parkinga mimo zakona, neophodan je hitan angažman PU Vogošća na terenu radi uvođenja reda, kao i konačno pokretanje zvanične procedure za izmjenu režima saobraćaja u jednosmjerni. U cilju zaštite sigurnosti građana i njihove djece, zahtijevam pismeni odgovor od nadležnih institucija u poslovničkom roku.

Vijećnik **Gluhović Alija (u ime Kluba vijećnika Naprijed BiH)** postavio je slijedeće vijećničko pitanje:

20/13. Dokle je došla rekonstrukcija i nadziđivanje, odnosno uređenje Upravne zgrade KSC Vogošća, jer se ista nalazi u očajnom stanju. Godinama smo imali najave za realizaciju ovog projekta, a na terenu se ne dešava ništa.

Vijećnik **Kulo Muamer (u ime Kluba vijećnika SDA)** postavio je slijedeća vijećnička pitanja:

- 20/14.** Molim KJKP „Vodovod i kanalizacija“ d.o.o. Sarajevo da dostavi informaciju kada planiraju izvršiti sanaciju kvarova na vodovodnoj mreži, jer smo svjedoci da na više lokacija naše općine Vogošća imamo evidentirane i utvrđene kvarove zbog kojih dolazi do gubitka vode. Također, želim informaciju da li zbog navedenih kvarova imamo redukciju vode. Moram naglasiti da na određenim lokacijama zbog kvara na vodovodnoj mreži imamo nekontrolisano gubljenje vode koje traje više od šest mjeseci.
- 20/15.** Molim Vladu Kantona Sarajevo da dostavi informaciju u kojoj su fazi realizacije 172 mjere važećeg „Programa skupštinske većine“ odnosno da dostavi početni i trenutni status, planirani i stvarni rok realizacije, planirana i utrošena sredstva za svaku mjeru pojedinačno.

Vijećnik **Omerović Denis (u ime Kluba vijećnika SDP)** postavio je slijedeća vijećnička pitanja:

- 20/16.** Da li je Općina Vogošća, zajedno sa nadležnim općinskim službama i javnim preduzećima, poduzela konkretne aktivnosti na pripremi za predstojeći period jeseni i zime, posebno u cilju prevencije poplava i drugih problema koji se ponavljaju prilikom obilnijih padavina. Da li je izvršen pregled i čišćenje vodotoka, kanalizacione i oborinske mreže, šahtova, propusta i kritičnih tačaka na području općine, te da li postoji plan preventivnog djelovanja u slučaju većih količina padavina. Molim da se dostavi informacija o do sada poduzetim mjerama, kao i o planiranim aktivnostima, kako bismo izbjegli scenarije i štete koje se na pojedinim lokacijama ponavljaju iz godine u godinu.
- 20/17.** Da li je Općina Vogošća napravila mapu kritičnih tačaka na području općine koje su u prethodnim godinama bile pogođene poplavama, odronima i drugim posljedicama obilnih padavina, te da li je za svaku od tih lokacija definisana konkretna preventivna mjera i rok za njenu realizaciju.

Vijećnik **Gljiva Bego (U ime Kluba vijećnika S BiH)** postavio je slijedeća vijećnička pitanja:

- 20/18.** Obzirom na sve veći pritisak javnosti i učestale primjedbe građana na prebrzu vožnju i neodgovorno ponašanje pojedinih vozača u centralnom dijelu Vogošće, posebno u Jošaničkoj ulici, pitam da li MUP Kantona Sarajevo, odnosno PU Vogošća, može razmotriti mogućnost postavljanja stacionarnog radara na ovoj lokaciji. Naime, ranije je već pokretana inicijativa za postavljanje usporivača brzine u Jošaničkoj ulici, na dionici od nove autobuske stanice do „Sofa“ marketa, upravo zbog problema sa prekoračenjem brzine i ugrožavanjem pješaka. Međutim, imajući u vidu da se ovom ulicom odvija javni autobuski saobraćaj, smatram da klasični „ležeći policajci“ možda nisu najbolje rješenje, jer mogu negativno uticati na nesmetano odvijanje javnog prevoza. Zbog toga u ime građana općine Vogošća postavljam pitanje da li MUP KS može sagledati mogućnost postavljanja stacionarnog radara za kontrolu brzine u Jošaničkoj ulici, kao efikasnije mjere koja ne bi ometala javni prevoz. Također, da li PU Vogošća može u narednom periodu pojačati prisustvo saobraćajne policije i vršiti ciljane kontrole brzine na ovoj lokaciji, posebno u periodima kada je prema informacijama građana problem najizraženiji u večernjim satima. Da li MUP KS smatra da ova lokacija ispunjava kriterije za postavljanje stacionarnog radara i ukoliko ne ispunjava, koje bi konkretne mjere bile najefikasnije za smanjenje brzine i povećanje sigurnosti pješaka i učesnika u saobraćaju.
- 20/19.** Postavljam pitanje Fondu za izgradnju Kantona Sarajevo koje glasi: Da li je dječije igralište koje je izgradio Fond Kantona Sarajevo za izgradnju stanova na lokalitetu Rosulje, u ulici 24. juna, na granici sa ulicom Rosulje, dobilo upotrebnu dozvolu i da li je izvršen stručni pregled njegove sigurnosti. Posebno želim ukazati na činjenicu da se igralište nalazi na prostoru sa visokim podzidima ispod samog igrališta, zbog čega smatram da je potrebno posebno provjeriti sigurnost djece, kako samog prostora za igru tako i zaštitnih ograda i podzida. Igralište je trenutno zatvoreno, ali ga djeca, prema informacijama građana, ipak koriste tako što preskaču zaštitnu ogradu i ulaze u prostor igrališta. Zbog toga pitam sa li je za ovo igralište izdata upotrebna dozvola i kada. Da li je izvršen stručni pregled kompletnog prostora, uključujući igralište, opremu, zaštitnu ogradu, podzide i pristupne površine. Da li visoki podzidi ispod igrališta ispunjavaju sve propisane sigurnosne uslove i da li postoji adekvatna zaštita od pada. Zbog čega je igralište trenutno zatvoreno. Ako postoje

sigurnosni ili tehnički nedostaci, šta je konkretno potrebno uraditi da se oni otklone. Imajući u vidu da djeca preskaču zaštitnu ogradu kako bi koristila igralište, šta će se konkretno poduzeti da se spriječi mogućnost povređivanja djece dok je igralište zatvoreno. Na kraju želim naglasiti da ovdje ne govorimo samo o tome da li igralište ima potrebnu dokumentaciju, govorimo o sigurnosti djece koja ulaze i borave u prostoru igrališta. Ako imamo igralište sa visokim podzidima, zaštitnom ogradom koju djeca preskaču i činjenicom da je igralište trenutno zatvoreno, smatram da moramo dobiti jasan odgovor da li je taj prostor u potpunosti siguran za djecu i ko je odgovoran da se eventualni nedostaci hitno otklone. Molim da se Vijeću dostavi odgovor i ukoliko postoji dokumentacija o upotrebnoj dozvoli i izvršenom stručnom pregledu sigurnosti igrališta.

Vijećnik **Piknjač Admir (Narod i pravda)** postavio je slijedeće vijećničko pitanje:

20/20. Pitam nadležnu općinsku službu zašto fontana u parku kod spomenika civilnim žrtvama rata (preko puta zgrade Općine Vogošća) nije stavljena u funkciju i puštena u rad. Koji su konkretni tehnički ili administrativni razlozi zašto ova fontana ne radi, te kada se planira njeno ponovno pokretanje.

Obrzloženje:

U izgradnju i uređenje ovog parka, spomen-obilježja i same fontane uložena su značajna budžetska sredstva. Logika nalaže da fontana, odmah nakon završetka zimskog perioda odnosno mrazeva, bude puštena u rad i da kontinuirano funkcioniše sve do jeseni. Ovaj park predstavlja jedno od centralnih mjesta okupljanja naših građana, penzionera i roditelja sa malom djecom. Upravo u ovim toplim mjesecima, funkcionalna fontana ima ključnu ulogu jer pruža neophodnu svježinu, smanjuje osjećaj vrućine i estetski upotpunjuje izgled samog centra Vogošće, što joj je primarna svrha. Činjenica da fontana ne radi, šalje lošu sliku o održavanju javnih površina i investicija u našoj općini. Građani s pravom negoduju jer prostor preko puta same zgrade Općine ne pruža sadržaj za koji je novac već izdvojen i ugođaj i ljepotu kojoj bi rad fontane doprinio.

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK
Stručna služba za poslove
Općinskog vijeća



Vogošća, ul. Jošanička br. 80, tel: 00387 33 586 412, 586-407, fax: 586-407

Broj: 12-04-sl./26

Vogošća, 28.08.2026.godine

**INICIJATIVE POKRENUTE
NA 20. REDOVNOJ SJEDNICI OPĆINSKOG VIJEĆA VOGOŠĆA
održanoj 27.08.2026. godine**

Na 20. redovnoj sjednici Općinskog vijeća vijećnik **Mehić Almedin (u ime Kluba vijećnika SDA)** pokrenuo je slijedeću inicijativu:

- 20/1.** Pokrećem inicijativu prema nadležnim organima da se konačno riješi problem rasvjete u ulici 24.juna u naselju Nova Vogošća.

Obrazloženje:

Naime, u naselju Nova Vogošća, ulica 24.juna, već duži vremenski period mi se javljaju građani koji imaju konstantan problem sa javnom rasvjetom. Iz izvora koje imam navodno se radi o podkapacitiranoj snazi električne energije koja ne može da zadovolji sve linije/mreže koje napajaju to područje. Naselje je prilično naseljeno, te je logično da i infrastruktura treba pratiti trend potrebe za većim energentima i ostalim instalacijama. Apelujem prema nadležnim organima da pod hitno riješe problem kako bi ljudi koji tu stanuju imali normalne uslove za život, jer trenutna situacija podsjeća na najmračnije ratne dane kada nije bilo struje, a u tom slučaju teren je pogodan za razna krivična djela, nezgode i ostale nepoželjne situacije.

Vijećnik **Efendić Emir (u ime Kluba vijećnika S BiH)** pokrenuo je slijedeće inicijative:

- 20/2.** Pokrećem inicijativu prema nadležnoj općinskoj službi i Ministarstvu saobraćaja Kantona Sarajevo, za postavljanje usporivača brzine u ulici 24. juna, općina Vogošća naselje Rosulje.

Obrazloženje:

Naime u naselju Rosulje više građana je zatražilo da se u ulici 24. juna iznad novosagrađenih stambenih zgrada od broja 18a do broja 18d postave usporivači brzine, obzirom da je navedena ulica veoma prometna i da vozači voze veoma brzo kroz navedenu ulicu što izaziva opasnost prvenstveno po djelu, stare i ostale stanovnike navedene ulice. Navedeni problem je naročito izražen kada je u ulici Igmanska saobraćajna gužva, što nije rijetko nakon čega vozači kako bi izbjegli saobraćajnu gužvu koriste alternativne pravce među kojim je najizraženiji ulicom 24. juna. Kako bi se smanjio rizik od neželjenih posljedica, ugroženosti djece, starih i ostalih građana, a povećala sigurnost pješaka u saobraćaju, potrebno je na navedenom lokalitetu postaviti adekvatnu saobraćajnu signalizaciju i usporivače brzine.

- 20/3.** Pokrećem inicijativu prema nadležnim da se poveća broj autobuskih linija prema naselju Rosulje, odnosno ulici 24. juna.

Obrazloženje:

Više građana naselja Rosulje su iznijeli problem vezan za neredovan prevoz putnika iz navedenog naselja. Zahtijevaju da se poveća broj autobuskih linija iz naselja Rosulje obzirom da u navedenom naselju živi veliki broj stanovnika, a da autobusi nisu redovni. Naime, građani iznose problem malog broja autobuskih linija iz navedenog naselja, isti zahtijevaju da nadležni povećaju broja linija autobusnog prevoza kako bi se zadovoljile njihove potrebe i poboljšao prevoz putnika. Potrebno je da ovlašteni prevoznici razmotre navedenu inicijativu i udovolje ukazanim potrebama građana.

Vijećnica **Curić Samira (u ime Kluba vijećnika SDP)** pokrenula je slijedeće inicijative:

- 20/4.** Pokrećem inicijativu za postavljanje vibrirajućih traka ili drugog odgovarajućeg usporivača brzine u ulici Branilaca vijenca, od broja 3. do 9.

Obrazloženje:

Pokrećem inicijativu nadležnoj službi da razmotri mogućnost postavljanja vibrirajućih traka, ležećeg policajca ili drugog odgovarajućeg sredstva za usporavanje saobraćaja u Ulici Branilaca vijenca, na potezu od broja 3. do 9. Naime, stambene zgrade na ovom potezu izgrađene su tako da se iz samih ulaza zgrada praktično odmah izlazi na saobraćajnicu. Zbog takvog položaja ulaza i neposredne blizine kolovoza, građani, a posebno roditelji, opravdano su zabrinuti za sigurnost djece koja svakodnevno izlaze iz zgrada i kreću se ovom ulicom. Poseban problem predstavlja činjenica da se u susjednoj ulici već nalaze vibrirajuće trake, zbog čega nesavjesni vozači, kako bi ih izbjegli, koriste ulicu Branilaca vijenca kao alternativni pravac, često prolazeći povećanom brzinom, kako bi što prije došli do raskrsnice prema Radića Potoku. Ovakvo ponašanje vozača dodatno ugrožava sigurnost stanara, a naročito djece, koja se zbog neposredne blizine ulaza i saobraćajnice mogu naći u opasnosti. Zbog svega navedenog, iniciram da nadležna služba izvrši uvid na terenu i u skladu sa saobraćajnim propisima i stručnom procjenom, poduzme odgovarajuće mjere za usporavanje saobraćaja na ovoj relaciji, prvenstveno postavljanjem vibrirajućih traka, usporivača brzine ili drugog adekvatnog rješenja. Smatram da je potrebno reagovati preventivno i pravovremeno, prije nego što neodgovorna vožnja na ovoj relaciji dovede do saobraćajne nezgode i ugrožavanja života i sigurnosti građana. Sigurnost djece i stanara mora biti prioritet.

- 20/5.** Pokrećem inicijativu prema nadležnoj općinskoj službi da se, u saradnji sa nadležnim javnim preduzećem, izvrši sanacija i zamjena dotrajalih vodovodnih cijevi u ulici Gornja Jošanica I.

Obrazloženje:

Stanovnici ulice Gornja Jošanica I već duži vremenski period suočavaju se sa učestalim pucanjem vodovodnih cijevi, što za posljedicu ima česte kvarove, prekide u vodosnabdijevanju, izlivanje vode na saobraćajnice i dodatno oštećenje putne infrastrukture. Prema informacijama građana, jedan od osnovnih razloga učestalih kvarova jeste dotrajalost i starost postojeće vodovodne mreže. Umjesto stalnih parcijalnih intervencija i ponavljanja istih popravki, smatram da je potrebno pristupiti sistemskom rješavanju problema, odnosno zamjeni starih i dotrajalih vodovodnih cijevi. Ovakvim pristupom smanjio bi se broj kvarova i intervencija, osigurala kvalitetnija i sigurnija isporuka pitke vode građanima, te spriječili nepotrebni troškovi nastali usljed stalnih popravki. Stoga predlažem da nadležna općinska služba, u saradnji sa nadležnim javnim preduzećem, izvrši uvid u stanje vodovodne mreže u ulici Gornja Jošanica I, utvrdi stepen dotrajalosti postojećih cijevi te, u skladu sa utvrđenim stanjem i mogućnostima, planira i realizuje njihovu potpunu zamjenu. Smatram da stanovnici ove ulice zaslužuju pouzdan i kvalitetan sistem vodosnabdijevanja, a trajno rješavanje ovog problema bilo bi mnogo efikasnije i racionalnije od stalnih pojedinačnih sanacija kvarova.

Vijećnik **Škoro Hamdija (u ime Kluba vijećnika Naprijed BiH)** pokrenuo je slijedeće inicijative:

- 20/6.** Pokrećem inicijativu da nadležna općinska služba u saradnji sa Policijskom upravom Vogošća pokuša naći način da se saobraćaj u mirovanju u ulici Braće Halać reguliše, obzirom da učesnici u saobraćaju ne poštuju saobraćajni znak parking za stanare, a da predstavnici policije rijetko ili nikako obilaze ovu ulicu, niti kažnjavaju neodgovorne vozače. Molim službu da u saradnji sa policijom pokuša regulisati ovaj problem, kao i poštivanje saobraćajnog znaka.

Vijećnik **Handžić Jasmin (u ime Kluba vijećnika SDA)** pokrenuo je slijedeću inicijativu:

- 20/8.** Pokrećem inicijativu prema Federalnom ministarstvu pravde za donošenje Zakona o javnim dobrima Federacije Bosne i Hercegovine.

Obrazloženje:

Donošenje Zakona o javnim dobrima Federacije Bosne i Hercegovine predstavlja potrebu proisteklu iz potrebe da se na jedinstven način uredi oblast koja je od neposrednog značaja za zaštitu javnog interesa. Postojeći pravni okvir uređuje određena pitanja javnih i općih dobara, ali ne pruža cjelovit normativni okvir za njihovo identifikovanje, sticanje i prestanak

svojstva, upravljanje, zaštitu i upis u javne evidencije. Poseban zakon omogućio bi jasnije utvrđivanje pravnog statusa javnih dobara i spriječio situacije u kojima se dobra koja po svojoj prirodi i namjeni trebaju služiti svim građanima koriste, prenamjenjuju ili se njima raspolaze suprotno javnom interesu. Istovremeno, donošenjem ovog zakona stvorili bi se uslovi za sistematsko evidentiranje postojećih javnih dobara, njihovu pravnu zaštitu i transparentnije upravljanje, čime bi se povećala pravna sigurnost i zaštitio javni interes Federacije Bosne i Hercegovine, kantona i jedinica lokalne samouprave. Zbog svega navedenog, smatra se opravdanim i nužnim pokretanje postupka za donošenje Zakona o javnim dobrima Federacije Bosne i Hercegovine.

Vijećnik **Gljiva Avdo (u ime Kluba vijećnika DF)** pokrenuo je slijedeću inicijativu:

- 20/10.** Pokrećem inicijativu da se u Semizovcu, na raskrsnici za Ilijaš, pravnim licima, privatnim radnjama, dodijele kante za smeće, jer ovaj broj kontejnera ni približno ne zadovoljava potrebe. Građani iz Ilijaša odlažu smeće, kao i okolno stanovništvo, u postojeće kontejnere. Obzirom da znate kako je KJKP „RAD“ ažuran, samo se kaže kakav je problem.

Vijećnik **Hebib Armin (u ime Kluba vijećnika SDP)** pokrenuo je slijedeće inicijative:

- 20/11.** Pokrećem inicijativu za rekonstrukciju i obnovu „Cvijet Srebrenice“ u ulici Feriza Merzuka.

Obrazloženje:

U ime građana Općine Vogošća, a posebno stanovnika ulice Feriza Merzuka, upućujem inicijativu da nadležna općinska služba, u saradnji sa nadležnim komunalnim preduzećem, pristupi rekonstrukciji, obnovi i uređenju obilježja „Cvijet Srebrenice“, koje se nalazi u navedenoj ulici. U prethodnom periodu u više navrata sam pokretao ovu inicijativu, postupajući po zahtjevima i sugestijama stanovnika ulice Feriza Merzuka. Nadležna služba je u saradnji sa komunalnim preduzećem, u određenoj mjeri održavala prostor oko obilježja, prvenstveno kroz košenje trave i redovno održavanje površine. Međutim, smatram da samo održavanje zelenih površina nije dovoljno, te da je potrebno izvršiti potpunu obnovu samog obilježja i vratiti mu prvobitni izgled. Obilježje je ranije bilo uređeno korištenjem malča i ukrasnog materijala, čime je njegov izgled bio znatno reprezentativniji i primjereniji značaju koji ima. Kao primjer dobre prakse možemo navesti uređenje grba Općine Vogošća u ulicama Jošanička i Omladinska, gdje je prostor oko obilježja uređen na način koji doprinosi njenoj vidljivosti, estetskom izgledu i očuvanju. Stoga predlažem da nadležna općinska služba razmotri mogućnost da se i obilježje „Cvijet Srebrenice“ u ulici Feriza Merzuka uredi na sličan način.

- 20/12.** Pokrećem inicijativu da se ulici Feriza Merzuka 17b, kod stambene zgrade, izvrši zamjena postojećih dotrajalih i neispravnih kontejnera za odlaganje komunalnog otpada, odnosno da se postave novi i funkcionalni kontejneri sa ispravnim poklopcima, kako bi se omogućilo uredno i higijensko odlaganje otpada.

Obrazloženje:

Na navedenoj lokaciji trenutno se nalaze kontejneri za odlaganje komunalnog otpada koji su u neispravnom i dotrajalom stanju, a posebno su problematični poklopci koji se ne mogu pravilno zatvoriti. Zbog nemogućnosti zatvaranja kontejnera, otpad je izložen vremenskim uslovima, životinjama i drugim vanjskim uticajima, što dodatno doprinosi neurednom izgledu prostora i stvaranju nehigijenskih uslova. Poseban problem predstavlja činjenica da se odlagalište otpada nalazi neposredno uz stambeni objekat, u blizini prozora i balkona stanara. Tokom ljetnih mjeseci, usljed visokih temperatura, dolazi do bržeg razgrađivanja otpada i stvaranja izrazito neugodnih mirisa, što direktno utiče na kvalitet života stanara. Pored neugodnih mirisa, neispravni kontejneri predstavljaju i problem sa aspekta higijene, komunalnog reda i zaštite okoliša. Otpad se zbog neispravnih poklopaca može rasipati oko kontejnera, čime se dodatno narušava urednost i izgled prostora. Smatram da je potrebno da nadležna općinska služba, u saradnji sa nadležnim komunalnim preduzećem, izvrši uvid na licu mjesta te poduzme potrebne aktivnosti na zamjeni postojećih neispravnih kontejnera ili postavljanju novih kontejnera sa ispravnim i funkcionalnim poklopcima. Realizacijom ove inicijative unaprijedili bi se higijenski i komunalni uslovi na navedenoj lokaciji, smanjilo širenje neugodnih mirisa, spriječilo rasipanje otpada i što je najvažnije, poboljšali uslovi života građana koji žive u neposrednoj blizini. S tim u vezi, upućujem navedenu vijećničku inicijativu nadležnim službama na razmatranje i poduzimanje konkretnih aktivnosti na rješavanju ovog problema.

Vijećnica **Salčin Sabiha (u ime Kluba vijećnika SDA)** pokrenula je slijedeće inicijative:

20/13. Pokrećem inicijativu prema Ministarstvu za odgoj i obrazovanje Kantona Sarajevo i Vladi Kantona Sarajevo da formira Savjet za digitalno obrazovanje Kantona Sarajevo kao stručno-savjetodavno tijelo čiji će zadatak biti kreiranje strateških smjernica za razvoj digitalnog obrazovanja, unapređenje STEM oblasti i usklađivanje obrazovnog sistema sa potrebama savremenog društva i tržišta rada.

Obrazloženje:

Digitalna transformacija društva i ubrzan razvoj novih tehnologija zahtijevaju kontinuirano prilagođavanje obrazovnog sistema. Učenici danas odrastaju u digitalnom okruženju i potrebno im je omogućiti sticanje digitalnih kompetencija, kritičkog razmišljanja, kreativnosti i vještina koje će biti ključne za njihovo buduće obrazovanje i zapošljavanje. Kanton Sarajevo posjeduje značajan potencijal u oblasti informacionih tehnologija, kao i razvijen IT sektor koji može biti važan partner u unapređenju obrazovnog sistema. Međutim, saradnja između obrazovnih institucija, akademske zajednice i privrede nije dovoljno institucionalizirana kako bi dala puni doprinos modernizaciji nastavnih planova i programa. Formiranjem Savjeta za digitalno obrazovanje stvorili bi se uslovi za sistemsko planiranje razvoja digitalnog obrazovanja i STEM oblasti, kao i za efikasnije povezivanje obrazovanja sa potrebama tržišta rada. Ulaganje u digitalno obrazovanje predstavlja ulaganje u budućnost naše djece i razvoj Kantona Sarajevo. Formiranjem Savjeta za digitalno obrazovanje stvorio bi se institucionalni okvir za kvalitetnije povezivanje obrazovanja, nauke i privrede te osigurali preduslovi da učenici steknu znanja i vještine potrebne za život i rad u 21. stoljeću. Stoga predlažem da Vlada Kantona Sarajevo i Ministarstvo za odgoj i obrazovanje Kantona Sarajevo razmotre ovu inicijativu i poduzmu aktivnosti na formiranju Savjeta za digitalno obrazovanje Kantona Sarajevo.

20/14. Pokrećem inicijativu prema Upravi policije MUP-a Kantona Sarajevo, Jedinici za saobraćaj da izvrši pojačan nadzor saobraćaja na području Vogošćanske petlje, posebno u poslijepodnevrim satima saobraćajnih opterećenja, te poduzme mjere prema vozačima koji namjernim kršenjem saobraćajnih pravila dodatno usporavaju i otežavaju odvijanje saobraćaja.

Obrazloženje:

Građani koji svakodnevno koriste saobraćajnicu na području Vogošćanske petlje ukazuju na učestalu pojavu nesavjesnih vozača koji, radi izbjegavanja kolona i čekanja, koriste saobraćajne trake koje nisu namijenjene za pravac njihovog kretanja, vrše nepropisna prevoženja neposredno pred uključanje u kolonu, presijecaju više saobraćajnih traka ili na druge načine zaobilaze utvrđeni režim odvijanja saobraćaja. Takvim ponašanjem pojedinci ostvaruju privremenu korist za sebe, ali istovremeno: usporavaju saobraćaj za vozače koji poštuju saobraćajne propise, stvaraju dodatna uska grla i zastoje, povećavaju rizik od saobraćajnih nezgoda, izazivaju nezadovoljstvo i osjećaj nepravde kod građana koji uredno čekaju u koloni i poštuju saobraćajne propise. Cilj ove inicijative nije kažnjavanje građana, nego uspostavljanje jednakih uslova za sve učesnike u saobraćaju, unapređenje sigurnosti i povećanje protoka saobraćaja na jednoj od najopterećenijih saobraćajnih tačaka u Kantonu Sarajevo. Molim Upravu policije MUP-a Kantona Sarajevo da razmotri ovu inicijativu i poduzme mjere iz svoje nadležnosti.

Vijećnica **Šabić Dalia (u ime Kluba vijećnika DF)** pokrenula je slijedeće inicijative:

20/15. Pokrećem inicijativu za sanaciju makadamskog puta prema naselju Budišići.

Obrazloženje:

Pokrećem inicijativu prema nadležnoj općinskoj službi za sanaciju makadamskog puta koji vodi prema naselju Budišići. Prema informacijama i pritužbama stanovnika, postojeći makadamski put nalazi se u izuzetno lošem stanju, sa brojnim oštećenjima, rupama i neravninama koje značajno otežavaju svakodnevno odvijanje saobraćaja i pristup naselju. Poseban problem nastaje u periodima obilnijih padavina, kada se stanje puta dodatno pogoršava, a postojeća oštećenja produbljuju, zbog čega je kretanje vozila otežano, a stanovnicima naselja svakodnevni dolazak do njihovih domova predstavlja dodatni problem. Molim nadležnu službu da izvrši uviđaj na terenu i pristupiti njegovoj kvalitetnoj sanaciji, uključujući ravnanje, nasipanje odgovarajućim materijalom i uređenje odvodnje tamo gdje je to potrebno, kako bi se spriječilo ponovno brzo propadanje puta.

20/16. Pokrećem inicijativu za obnovu horizontalne saobraćajne signalizacije u ulicama Jošanička i Omladinska

Obrazloženje:

Pokrećemo inicijativu prema nadležnoj Direkciji za puteve za pregled stanja i obnovu horizontalne saobraćajne signalizacije u ulicama Jošanička i Omladinska na području općine Vogošća. Postojeća horizontalna signalizacija na ovim saobraćajnicama je na više mjesta značajno izbljedjela i slabo uočljiva, uključujući oznake na kolovozu i pješačke prelaze. S obzirom na frekventnost navedenih ulica, veliki broj vozila i pješaka koji ih svakodnevno koriste, smatramo da je potrebno izvršiti pregled kompletne horizontalne signalizacije i pristupiti njenom ponovnom iscrtavanju na svim mjestima gdje je dotrajala ili nedovoljno vidljiva. Posebnu pažnju potrebno je posvetiti pješačkim prelazima, kako bi bili jasno i pravovremeno uočljivi vozačima i kako bi se povećala sigurnost svih učesnika u saobraćaju. Molimo nadležne da u što kraćem roku izvrši pregled stanja na terenu i pristupi obnovi horizontalne signalizacije u ulicama Jošanička i Omladinska.

Vijećnik **Pašagić Almir (u ime Kluba vijećnika SDP)** pokrenuo je slijedeće inicijative:

20/17. Pokrećem inicijativu da Općina Vogošća pokrene i finansira izgradnju ili kupovinu vlastite funkcionalne kuće/objekta na području općine Srebrenica, te da se ista inicijativa uputi svim ostalim općinama na području Kantona Sarajevo.

Inicijativa:

Pokreće se inicijativa da svaka od devet općina Kantona Sarajevo (Stari Grad, Centar, Novo Sarajevo, Novi Grad, Ilidža, Vogošća, Hadžići, Ilijaš i Trnovo) preuzme trajnu obavezu prema Srebrenici kroz projekat „Kuća od srca općina Kantona Sarajevo u Srebrenici“. Svaka općina bi na području Srebrenice posjedovala i održavala jedan objekat koji bi služio kao trajna spona, institucionalno prisustvo i direktna podrška održivom povratku.

Ciljevi inicijative:

Trajna institucionalna obaveza: Materijalno i pravno vezivanje glavnog grada i njegovih općina za prostor na kojem je počinjen genocid.

Podrška održivom povratku: Angažovanje lokalnih firmi za izgradnju i održavanje objekata. Edukacija i memorijalizacija: Objekti bi služili za smještaj učenika, studenata, istraživača i delegacija koje posjećuju Memorijalni centar Potočari.

Revitalizacija Srebrenice: Stalna fluktuacija ljudi iz Kantona Sarajevo koji bi boravili u ovim objektima i pomagali lokalnu ekonomiju.

Koraci za realizaciju:

1. Usvajanje inicijative na nivou Općinskog vijeća.
2. Upućivanje prijedloga Koordinaciji načelnika i gradonačelnika Kantona Sarajevo radi usaglašavanja.
3. Planiranje budžeta za narednu fiskalnu godinu za kupovinu zemljišta ili postojećih objekata u Srebrenici.
4. Saradnja sa Opštinom Srebrenica i udruženjima žrtava oko odabira lokacija.

Obrazloženje:

Poštovanje prema žrtvama genocida ne smije biti svedeno samo na prigodne posjete 11. jula. Kanton Sarajevo, kao ekonomski najjači kanton, ima moralnu i historijsku dužnost da osigura trajno, fizičko i institucionalno prisustvo na području Srebrenice. Kupovinom ili izgradnjom ovih kuća, općine se trajno obavezuju da brinu o tom prostoru, razvijaju projekte i osiguraju da se istina o genocidu aktivno živi kroz konkretnu podršku lokalnoj zajednici. Ova inicijativa nudi konkretan mehanizam održive podrške kroz uspostavljanje „Kuća od srca općina Kantona Sarajevo“. Primarna svrha ovih objekata bila bi logistička, edukativna i memorijalna podrška kroz cijelu godinu, sa posebnim fokusom na ključne periode komemoracije:

Logistika za Marš mira: Svake godine hiljade ljudi iz Sarajeva i cijelog svijeta pješače stotinama kilometara u znak sjećanja na žrtve. Kuće općina bi služile kao sigurne baze, mjesta za odmor, okrjepu i logističku podršku učesnicima Marša mira prije i nakon dolaska u Potočare.

Smještajni kapaciteti za 11. juli: Tokom obilježavanja godišnjice genocida, Srebrenica se suočava sa hroničnim nedostatkom smještaja za zvanične goste, preživjele, porodice žrtava i volontere. Ove kuće bi direktno riješile taj problem, pružajući besplatan i dostojanstven smještaj onima kojima je najpotrebniji.

Cjelogodišnja edukacija mladih: Objekti ne bi bili prazni tokom ostatka godine. Svaka općina bi imala obavezu da organizuje i finansira posjete učenika osnovnih i srednjih škola, studenata, istraživača i umjetnika. Na taj način bi se osiguralo da nove generacije kontinuirano uče o genocidu na mjestu gdje se on dogodio. Kupovinom, izgradnjom i

preuzimanjem obaveze održavanja ovih objekata, općine Kantona Sarajevo direktno investiraju u lokalnu ekonomiju Srebrenice kroz angažman domaćih firmi. Što je najvažnije, time šaljemo trajnu poruku povratnicima da nisu sami i da je Sarajevo institucionalno i fizički prisutno na tom prostoru svakog dana u godini, a ne samo sredinom jula.

- 20/18.** Pokrećem inicijativu da Općina Vogošća, u saradnji sa nadležnom Policijskom upravom i Civilnom zaštitom pokrene proceduru javne nabavke i postavljanja dnevno-noćnih kamera visoke rezolucije na kritičnim tačkama duž šumskog i priobalnog pojasa Jošaničkog potoka. Glavna svrha ovog video nadzora je preventivno djelovanje, rano uočavanje dima i vatre, te vizuelna identifikacija i sankcionisanje neodgovornih pojedinaca koji paljenjem vatre na otvorenom, korova ili odlaganjem zapaljivog otpada izazivaju direktnu opasnost od požara širih razmjera.

Obrazloženje:

Područje oko Jošaničkog potoka karakteriše bogat vegetacijski pojas i blizina stambenih objekata, što ga u ljetnim i sušnim mjesecima čini izuzetno ranjivim na šumske požare i požare na otvorenom. Praksa pokazuje da je ljudski faktor najčešći uzročnik ovakvih katastrofa, bilo da se radi o namjernom paljenju ili neopreznom čišćenju privatnih parcela. Uvođenjem adekvatnog video nadzora postigli bi se sljedeći ciljevi:

Prevenција i odvrаćanje: Samo prisustvo vidno obilježenih kamera i tabli s upozorenjem drastično smanjuje šanse da pojedinci vrše nelegalne aktivnosti ili pale vatru na mjestima gdje je to zakonom zabranjeno.

Brza reakcija nadležnih službi: Kamere omogućavaju dežurnim službama vizuelno uočavanje dima i lociranje požara u samom nastanku, što ubrzava izlazak vatrogasaca na teren i smanjuje materijalnu štetu.

Lakša identifikacija počinitelja: Jasni snimci visoke rezolucije služe kao zakonit dokaz policijskim organima za identifikaciju lica, prepoznavanje registarskih tablica vozila i krivično/prekršajno procesuiranje osoba koje izazivaju opštu opasnost.

Smanjenje divljih deponija: Kamere bi dodatno riješile problem nelegalnog odlaganja kabastog i lako zapaljivog otpada koji često služi kao pogonsko gorivo za brzo širenje požara. S obzirom na to da su raniji incidenti i požari na području općine pokazali koliku opasnost otvoreni plamen predstavlja za živote i imovinu građana, smatram da je ulaganje u tehničku zaštitu ovog lokaliteta opravdan i hitan korak. Molim nadležne službe da razmotre tehničke mogućnosti, odrede mikrolokacije za stubove s kamerama i uvrste ovaj projekat u budžetske planove za naredni period.

Vijećnik **Omerović Denis (u ime Kluba vijećnika SDP)** pokrenuo je slijedeće inicijative:

- 20/19.** Pokrećem inicijativu da se izvrši pregled i zamjena neispravnih sijalica javne rasvjete u ulici Stara Željeznička stanica.

Obrazloženje:

Na navedenoj ulici trenutno više rasvjetnih tijela nije u funkciji, čime je ulica nedovoljno osvijetljena. Kao jedan od konkretnih primjera, dvije sijalice javne rasvjete koje se nalaze ispred kuća sa brojevima 33. i 34., nisu u funkciji. Molim nadležnu službu da izvrši pregled javne rasvjete na cijeloj ulici te da se neispravne sijalice, odnosno rasvjetna tijela, zamijene u što kraćem roku, kako bi se osigurala adekvatna osvijetljenost i sigurnost stanovnika ove ulice.

- 20/20.** Pokrećem ponovo inicijativu za uklanjanje predmetnog starog i trulog stabla na dionici Semizovac – Donja Vogošća

Obrazloženje:

S obzirom na to da, uprkos ranijem odgovoru nadležne službe i izdatom Rješenju za sječu, navedeno stablo nikada nije uklonjeno ponavljam inicijativu. Smatram sramotnim da se građani i vijećnici nakon toliko vremena i dalje moraju baviti pitanjem koje direktno ugrožava sigurnost ljudi i učesnika u saobraćaju. Zbog opšte sigurnosti građana insistirat ću na realizaciji ove inicijative sve dok problem ne bude riješen. Ukoliko zbog daljnjeg nepostupanja nadležnih dođe do povrede građana, materijalne štete ili tragičnog ishoda, odgovornost će biti na onima koji su bili upoznati sa problemom i nisu poduzeli potrebne mjere. Molim nadležnu službu da predmetno stablo ukloni bez daljnjeg odlaganja i dostavi informaciju o poduzetim aktivnostima.

Vijećnik **Gljiva Bego (u ime Kluba vijećnika S BiH)** pokrenuo je slijedeću inicijativu:

20/21. Pokrećem inicijativu prema Vladi Kantona Sarajevo, Ministarstvu unutrašnjih poslova Kantona Sarajevo, Ministarstvu saobraćaja Kantona Sarajevo i Ministarstvu za odgoj i obrazovanje Kantona Sarajevo da se uoči početka nove školske godine, izvrši hitan pregled sigurnosti svih školskih zona na području općine Vogošća. Tražim da se u saradnji sa Općinom Vogošća, utvrde sve lokacije na kojima je potrebno:

- dodatno obilježiti i osvijetliti pješačke prelaze
- postaviti odgovarajuću saobraćajnu signalizaciju i upozorenja za vozače
- pojačati kontrolu brzine u blizini škola
- provjeriti uličnu rasvjetu, preglednost i sigurnost prilaza školama
- po potrebi postaviti kamere ili druge sisteme za nadzor saobraćaja na kritičnim lokacijama.

Obrazloženje:

Početak školske godine znači i povećan broj djece i roditelja na ulicama, kao i veći intenzitet saobraćaja u blizini školskih objekata. Naš cilj mora biti jednostavan – da svako dijete u Vogošći može sigurno doći u školu i vratiti se kući. Zato tražim da nadležni kantonalni organi izvrše pregled školskih zona i Općinskom vijeću Vogošća dostave informaciju o utvrđenim problemima i planiranim mjerama za njihovo otklanjanje.

Vijećnik **Piknjač Admir (Narod i pravda)** pokrenuo je slijedeće inicijative:

20/22. Pokrećem inicijativu za pokretanje sistemskih aktivnosti na razvoju općeg, istorijskog, memoorijalnog i rekreativnog turizma na području naše općine Vogošća, kroz uvezivanje promovisanja naših istorijskih spomenika i postojećih prirodnih i infrastrukturnih kapaciteta.

Obrazloženje:

Zamolio bih nadležnu službu da razmotri uvezivanje mnogobrojnih udruženja, privrednih društava i svih drugih relevantnih subjekata sa područja naše općine i da prezentira i predloži istim jedan ozbiljan plan promovisanja turizma u našoj općini i to: kreiranje integrisane turističke rute koja će povezati ključne istorijske tačke, npr. lokaciju polaska Igmanskog marša iz 1942. godine, spomen kompleks u Krivoglavcima, Džindino brdo, preduzeće "Pretis", „Tas“, Krila slobode na brdu Žuč, naše rekreativne zone, šetalište Jošanički potok, itd. Također, staviti u funkciju turizma ključne objekte Planinarski dom Motka kao centralnu tačku za planinare i ljubitelje prirode i bivšu školu u Budišićima. Pokrenuti inicijativu za njenu obnovu i vraćanje predratne namjene "Škole u prirodi", što bi bio jedinstven obrazovni centar u Kantonu Sarajevo. Objekat Crvenog krsta - ostvariti saradnju i staviti ovaj objekat u funkciju smještajnih ili edukativnih kapaciteta za turističke i omladinske grupe. Uvezati lokalna boračka udruženja, Udruženje antifašista i boraca NOR-a, planinarska društva i Crveni krst, kako bi zajednički upravljali ovom ponudom, vodili turističke grupe i organizovali sadržaje. Uvesti redovne časove istorijske škole i školu u prirodi u saradnji sa školama i Ministarstvom za odgoj i obrazovanje Kantona Sarajevo. Omogućiti učenicima jednodnevne ili višednevne boravke na relaciji Jošanički potok-Budišići- Motka, gdje bi kroz pješačke ture učili o istoriji, prirodi, ekologiji i dr. Postaviti signalizaciju i oglasne ploče, te izgraditi dodatne klupe sa atraktivnih vidikovaca na istorijskim uzvišenjima. Napominjem da Vogošća i ova inicijativa ne mora graditi turistički potencijal od nule - mi ga već imamo na terenu. Imamo spomenike koji svjedoče heroizmu, imamo prelijepo šetalište duž Jošaničkog potoka, planinarski dom na Motki, te objekte poput škole u Budišićima i doma Crvenog krsta koje treba dodatno aktivirati i adaptirati za ovu vrstu namjene. Uvezivanjem istorije i prirode, te stavljanjem postojećih objekata u funkciju, Vogošća može postati vodeća općina u Kantonu Sarajevo za ekskurzije, škole u prirodi, te vikend-turizam domaćih i stranih gostiju. Finansiranje ovih projekata treba planirati apliciranjem prema Ministarstvu privrede Kantona Sarajevo, Ministarstvu za boračka pitanja Kantona Sarajevo, preko fondova za zaštitu okoliša itd.

20/23. Pokrećem inicijativu da se pristupi izmjeni odgovarajućih odredbi Poslovnika Općinskog vijeća Vogošća na način da se propisani rok za dostavu radnih materijala za redovne sjednice vijećnicima produži sa sadašnjih 7 (sedam) na 10 (deset) dana prije dana održavanja redovne sjednice Općinskog vijeća.

Obrazloženje:

Obim, kompleksnost i važnost materijala o kojima vijećnici odlučuju, odnosno kada su u programu rada Općinskog vijeća tačke (usvajanje budžeta, izmjene i dopune budžeta, regulacioni planovi, izvještaji o radu načelnika i općinskih službi itd.) zahtijevaju detaljnu

analizu i konsultacije s građanima, stručnjacima i Općinskim organizacijama, odnosno političkim subjektima izabranog vijećnika. Trenutni rok od 7 dana ostavlja premalo vremena za kvalitetnu pripremu vijećnika koji hoće da pročitaju kompletan radni materijal, naprave analizu, te uđu u konstruktivnu i kvalitetnu raspravu i diskusiju. Produženjem roka na 10 dana značajno bi se podigla kvaliteta donošenja odluka i transparentnost rada samog Vijeća. Zamolio bih nadležnu Komisiju za Statut i propise i nadležnu službu da pripreme prijedlog izmjene Poslovnika i upute ga Vijeću na usvajanje.

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir